



Innuttaasut immikkut tamarmik kiassarnermut atukkaminnik taamaallaat akiliisaleqqullugit, Nukissiorfinnit kiassarneqartut tamarmik immikkut uuttuutilersorneqarnissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamanna aallarteqquneqarpoq kingusinnerpaamik ulloq 1. januaari 2017.

(Inatsisartunut ilaasortaq Michael Rosing, Demokraatit)
(Siullermeenera)

Demokraatini tunngaviusumik isumaqarpugut inuit ataasiakkaat iliuitsitik namminneq akisussaaffigissagaat. Aamma isumaqarpugut ataasiakkaat periarfissaqassasut inuunerminnik nammineq aqutsissallutik. Assersuutigalugu kiassarnermut akiligassat atuunnerat uagut isumarput naapertorlugu akisussaaffiaaneruvoq. Oqallisigineqarsinnaavoq suna eqqortuunersoq naapertuunnorsorlu inuiaqatigiit inunnut ataasiakkaanut kifartuussineranni akigitinneqartartoq eqqarsaatigalugu, kisianni isumaqarpugut, inuit ataasiakkaarlutik atuisimanitik kisiisa akilissallugit pisussaaffigigaat.

Taamaattumik una siunnersuut nuannaarutigaarput tamanut iluaqusiisussaammat. Qularnangitsumik atuineq annertuumik appassaaq peqataanillu kiassarnermut akiliutigineqartartut. Aamma inuit ataasiakkaat namminneq aqussinnaalissavaat atuinertik taamaasillutillu namminneq pigisatik pillugit pingaarnersiuisinnaalerlutik.

Aammali inuiaqatigiit iluaquserneqarsinnaasariaqarput, kiassaateqarfiit, kissamik pilersuisut init amerlanerit kiassarsinnaangussammatigit, init ataasiakkaat kiassarnermik annikinnerusumik atuisalerpata.

Apeqqutissaqarpugulli arlalinnik ataatsimiititaliamut misissulaaqqsatsinnik siunnersuutip suliarineranut atatillugu.

- Periarfissat piviusorsioertut suuppat inissiani qanganitsani ataasiakkaani kiassarnermut uuttuutit ikkussorneqassagaluarpata aamma uuttuutit allattorneqartarnissaannut suut pisariaqarpat?

- Kiap akisussaaffigissavaa kiassarnermut uuttuutit ataasiakkaat allattortarnissaat?

Taamaattumik siunnersuut Sanaartornermut Ataatsimiititalimut suliareqqitassanngorlugu ingerlateqqipparput.